

Nominà dudesch chanzuns

La concorrenza da cumposiziun ha chattà grond interess

■ (anr/ac) La concorrenza da cumposiziun instradada da l'uniun La chanzun rumantscha è terminada, la giuria ha fatg la schelta, cumponistas e cumponists undrads èn infurmads. La tenda sur cumposiziuns e cumponists s'avra dentant pir la primavera proxima a chaschun dal festival da la chanzun rumantscha a Trun. *Christoph Cajöri* è fitg cuntent, il musicist e dirigent da la Ligia Grischa è responsabel entaifer la suprastanza da l'uniun Chanzun rumantscha per la concorrenza da cumposiziun. Enfin ils 11 da zercladur 2018 èn 31 cumposiziuns arrivadas en la chascha da brevs da Cajöri. Cumposiziuns repartidas gulivà sin las trais categorias da la concorrenza, la chanzun d'uffants (nov cumposiziuns), chanzuns per chor maschadà (12 cumposiziuns) e per chor viril (10 cumposiziuns). Betg sulet davart da la participaziun a la concorrenza da cumposiziun è Cajöri cuntent, mabain era pertutgant la qualitat. sco el ha tradì sin dumonda. El n'è dentant betg stà in-



Dudesch da 31 cumposiziuns ha la giuria da la concorrenza da cumposiziun undrà e nominà.

FOTO A. CADONAU

volvà en la selezziun da las cumposiziuns. Quella incarica ha l'uniun surdà a la giuria timunada da *Karl Scheuber*, docent da musica a la scola auta d'art a Turitg. E quella giuria ha terminà sia incarica, la selezziun en mintga singula categoria è fatga, ils cumponists undrads infurmads. Lur nums restan dentant tschelads enfin

ils 15, 16 e 17 da mars 2019. A chaschun dal Festival da la chanzun rumantscha vegnan las cumposiziuns e cumponistas ubain cumponists preschentads al public. Da las 31 cumposiziuns chattan 12 la via en la publicitad. En mintgina da las trais categorias ha la giuria surdà trais premis dotads cun ina summa dad 1500

enfin 500 francs ed elegì ina quarta cumposiziun che vegn medemamain preschentada al public dal festival a Trun. Uschia posseda era quella quarta chanzun la pussaivladad da persvader il public.

Las preparativas s'avanzan

Cuntent cun la participaziun a la concorrenza da cumposiziun è medemamain in dals mainaprojects ed iniziand dal Festival da la chanzun rumantscha, *Clau Scherrer*. El è surstà da la participaziun a la concorrenza ed inchantà dal dumber da las cumposiziuns inoltradas. Intginas da las cumposiziuns ha el vesì, davart ils creaders da las ovras po el sulet specular pil mument. Scherrer ha explitgà che l'uniun vegnia proximamain a pledentar differents chors cun la dumonda davart lur prontadad dad intonar las quatter cumposiziuns da mintga singula categoria tschernidas da la giuria. Chors pronti da preschentar las cumposiziuns al public dal Festival da la chanzun ruman-

tscha. I vegnia ad esser chors cun activitads regionalas pledentads per l'incarica. Scherrer ha menziunà la pretensiu stitulada vers ils cumponists participants a la concorrenza dad inoltrar cumposiziuns simplas adattadas per ils chors dals vitgs. Las dudesch cumposiziuns vegnian edidas e stettian silsunter a disposiziun al chant. A pled vegn anc il public dal Festival da la chanzun rumantscha. Da las dudesch chanzuns preschentadas al festival po el eleger la chanzun preferida. L'uniun ha era mess a disposiziun divers texts dad auturas ed auturs rumantschs als cumponists pronti da sa participar a la concorrenza. Sco quai che Scherrer ha ditg saja per part vegnì fatg diever da la purschida, plirs cumponists hajan tschernì auters texts, en scadin cas en tut ils idioms. La concorrenza da cumposiziun è ina interessanta chausa e procura per in zichel tensiun.

Ulterius infurmaziuns porscha l'uniun La chanzun rumantscha ils 9 da november a chaschun da la radunanza generala a Trun.